

**Najib Perdana Menteri Yang Dengar Suara Rakyat - Ghani Gilong
Bernama
19 April , 2012
Oleh Newmond Tibin dan Siti Zubaidah Abdullah**

KOTA KINABALU, 19 April (Bernama) -- Tokoh veteran Sabah Tan Sri Abdul Ghani Gilong berkata Gagasan 1Malaysia adalah idea terbaik ke arah mewujudkan sebuah negara Malaysia yang bersatu dan berjaya.

Abdul Ghani yang pernah berkhidmat sebagai menteri persekutuan sehingga tahun 1978, turut mengagumi ketokohan Perdana Menteri Datuk Seri Najib Tun Razak yang disifatkannya sebagai pemimpin yang mahu mendengar suara rakyat.

"Secara peribadi saya mengagumi beliau sebagai perdana menteri yang baik," kata Abdul Ghani, 79, dalam temu bual dengan Bernama di kediamannya di Bukit Bendera di sini.

Beliau berkata gagasan 1Malaysia dan program transformasi nasional adalah idea yang bijak dan faktor ini adalah asas beliau meramalkan Barisan Nasional (BN) mampu beroleh kejayaan besar pada pilihan raya umum ke-13 kelak di Sabah dan seluruh negara.

Ini ditambah dengan kepimpinan Ketua Menteri Sabah Datuk Seri Musa Aman yang berjaya memperkukuh kedudukan ekonomi dan mewujudkan suasana politik yang kondusif untuk pelaburan dan pembangunan di Sabah.

Abdul Ghani, seorang daripada empat penerima Anugerah Tokoh Malaysia sempena sambutan Hari Malaysia tahun 2010.

"Konsep (1Malaysia) ini baik dan bijak kerana memberi kefahaman bahawa kita adalah orang Malaysia yang mesti bersatu hati, bersatu padu dalam membuat sesuatu yang terbaik untuk kebaikan negara termasuk mengelak huru-hara dan rusuhan kaum," katanya.

POLITIK SABAH

Sejak berkecimpung dalam politik pada 1963, beliau pernah memegang jawatan di peringkat persekutuan sebagai menteri hal ehwal Sabah, menteri kehakiman dan pertahanan awam, menteri kerja raya dan menteri pengangkutan.

Beliau memainkan peranan penting sebagai wakil Pertubuhan Kebangsaan Kadazan Bersatu (UNKO) dalam dialog dan perundingan mengenai penubuhan Malaysia.

Walaupun tidak lagi aktif dalam politik, menurut Abdul Ghani, beliau sentiasa mengikuti perkembangan politik negara dan baginya, penerimaan rakyat terhadap kerajaan di tahap baik termasuk di Sabah.

"Meskipun banyak kritikan yang berpunca dari parti pembangkang tetapi pada pendapat saya akhirnya seperti biasa, orang akan kembali kepada BN kerana orang (mereka) memikirkan apa yang dikatakan oleh parti pembangkang adalah tidak betul. Soalnya apa yang mereka (pembangkang) cakap, mereka tidak dapat tunai janji seperti yang

dihebohkan," katanya.

Abdul Ghani berkata dari segi kemajuan Sabah, sebelum menyertai Malaysia dan sesudah berada dalam Malaysia, beliau melihat memang jauh perbezaannya.

"Pada masa dahulu, Sabah banyak jauh ketinggalan dari segi pembangunan terutama dari segi infrastruktur - jalan raya dan sekolah - namun sekarang banyak kemajuannya.

"Saya orang Sabah yang telah mengikuti perkembangan (politik) di negeri ini termasuk hasrat negeri ini untuk menyertai Malaysia dan ketika itu saya tahu macam mana kami pada masa dulu dan kini," katanya.

Abdul Ghani melihat isu 'Malaysian Agreement' sengaja dibangkitkan pembangkang sedangkan rundingan untuk mencari penyelesaian yang terbaik daripada setiap perkara antara pihak persekutuan dan negeri sentiasa diadakan.

KENAPA BARISAN NASIONAL?

Berkaitan dengan ini juga, Abdul Ghani berkata rakyat Sabah perlu mengekalkan kerajaan BN sebagai peneraju negara, "kerana hanya BN boleh menunaikan janji dan kemahuan rakyat Sabah."

"Di Sabah sendiripun, banyak pembangunan yang dilaksanakan oleh kerajaan negeri di bawah pimpinan Musa selain meletakkan kedudukan kewangan negeri ini terus kukuh bersama transformasi pembangunan yang amat ketara," katanya.

Tambahan pula, katanya, kini rakyat semakin banyak merasai pemberian dan bantuan kerajaan untuk bersama melalui proses transformasi negara seperti Bantuan Rakyat 1Malaysia RM500, bantuan persekolahan RM100, dan baucar buku RM200 masing-masing untuk seisi keluarga, murid sekolah rendah dan pelajar sekolah menengah serta institusi pengajian tinggi.

"Program tranformasi negara ini sangat baik dan kita berharap untuk mencapai matlamat ini," katanya.

STRATEGI BN

Mengenai strategi BN untuk memastikan kemenangan pada PRU ke-13, Abdul Ghani berkata BN harus memastikan semua janjinya ditunai.

"Ini kerana rakyat kini pandai menilai prestasi kerajaan...kalau mereka merasakan tidak dipedulikan sudah tentu mereka akan berhijrah ke parti lain khususnya parti pembangkang.

"Oleh itu kerajaan yang ada sekarang perlu jujur untuk memenuhi apa yang diharapkan oleh rakyat supaya ia terus mendapat sokongan," katanya.

Beliau turut menasihatkan golongan pengundi muda supaya berfikir betul-betul dan melihat ke hadapan.

"Kalau tidak, mereka tidak dapat lihat seperti yang apa terjadi (keadaan di negara lain) yang tidak menentu. (Selain itu) orang muda harus diberi gambaran lebih jelas dan bermakna, mereka juga harus mempunyai rasa tanggungjawab sebagai rakyat negara ini.

"Saya seru mereka menyokong usaha kerajaan yang telah banyak memberi kebaikan dan kesempurnaan hidup kepada negara kita yang merdeka ini. Kelebihan kerajaan BN sekarang ialah kerana ada kesungguhan dan kesediaan mendengar suara dan rungutan rakyat termasuk golongan muda, dan seterusnya berusaha membetulkan keadaan." katanya.

---BERNAMA

Hakcipta © 2012 BERNAMA

Source: <http://www.bernama.com/bernama/v6/bm/newsindex.php?id=660228>